

■ GLOSSA

Tgi less in cumpromiss?

DA SILVIO CAMENISCH

Nus lain la pasch, nus dain la pasch, quai savain nus, exercitain nus er en curs da repetiziun als servetschs divins da la baselgia la cultura e litteratura. Nus dain il bel maun per in bel cumpromiss, il maltgiert per in maltgiert cumpromiss na stuain nus betg dar vesavlamain, jau manegel ch'ins vesa. Vesa uschia u uschia tras la taila da Vossas chautschas e nosas chautschas co ch'i vegn fatg pugn en satg, tut tgenin tip agressiv cun cuntè da satg svizzer enta pugn! È il cumpromiss cumpromiss marsch, dastgain nus quai, qua essan nus daditg en la guerra cunter ils tilafils e la traditura.

Lain nus la pasch, e quella lain nus quella giada, faschain nus il cumpromiss er egal tgenin. Il cumpromiss lia, el è liant, quai ch'ils dieus da la Lia lian, na duess l'uman betg schliar. Schlià èsi tut lasuenter pli svelte che lià, conuschain nus abundantamain dad autras lias, jau manegel colliaziuns connexiuns e cumbinaziuns er egal tgeninas. En l'uniun culturala, en l'uniun matrimoniala. Il bun e fauss cumpromiss sco sortida da segirezza, Notausgang, è ina buna chaussa. Grazia



fitg a vus babs dal cumpromiss. Essas nominads senza emprimas giurias e segundas giurias per il premi Cumpromiss da la pasch.

Il cumpromiss gist creà or da la retorta na plascha betg a tuts, a tuts na stuain na lain nus betg plaschair. Il cumpromiss n'è betg manegià per plaschair da tuts e da tuttas, i tanscha sufficient sch'ils propi babs dal cumpromiss han nar plaschair, noss plaschair n'èsi betg vairamain, nus avain auters plaschairs. Il cumpromiss gist creà lascha avert bler, en sasez tut. Nus pudain nus dastgain chantar cun buna conscienza O happy day cun Bo Katzman, quel è cult, sche quel n'è betg na sai jau betg, a medem temp jodlar insanu'uter, ha il Bo fatg daditg ed er la dunna. Il cumpromiss i lascha tiers.

Nus dumandain ils uffants: Lessas l'entir emballadi d'embrugl da meds d'instrucziun, navair, tge emballadiun, tants, u na lessas nagins? Noss cumpromiss i lascha avert, lais l'entir u na lais betg, sco vus lais. Als babs dal bel cumpromiss plaschi, sch'ins prenda l'entir emballadi d'embrugl, 5 + 1 meds d'instrucziun mo rumantscha, insatge unic sin quest mund. Roba da quest muond che nus prendain cun vi en tsel muond. Dastgain nus esser loschs, superbis na lain betg esser, sch'il cumpromiss fiss era motiv avunda.

Tgi less in bel cumpromiss? 50% rabat d'avertura! En nossa catedrala da cumpras City West retschavais il cumpromiss excepziunal, signur Uvestg. Cun quel han assistentas pastorals che lessan la licenza, schais en linguatg ecclesiastic la dispensa da pregiar u da predegiar, vegn or sin il medem, e quellas lessan! Pertge retegnair insatgi insatge che less. Il cumpromiss fiss qua avert, also betg serrà. Tgi less noss bel cumpromiss... qua, 50% rabat d'avertura, latiers noss ballon excepziunal e tschigulatta da latg da la pasch.